



**Харилцаа холбооны зохицуулах хорооны
2023 оны ээлжит 16 дугаар хуралдааны
мэдээлэл**

Монгол Улсын Харилцаа холбооны зохицуулах хорооны 2023 оны ээлжит 16 дугаар хуралдаан 2023 оны 12 дугаар сарын 20-ны өдөр болов.

Харилцаа холбооны зохицуулах хорооны 2023 оны ээлжит 16 дугаар хуралдаанаар “Харилцаа холбооны зохицуулах хорооны 2024 оны үйл ажиллагааны төлөвлөгөө, орлогын төлөвлөгөө болон зардал, байгууллагын 2025-2026 оны төсвийн төсөөлөл”-ийг (Үүнд: ХХЗХ-ны 2024 оны үйл ажиллагааны төлөвлөгөө”-ний төсөл; “ХХЗХ-ны 2024 оны орлогын төлөвлөгөө”-ний төсөл; “ХХЗХ-ны 2024 оны зардлын төлөвлөгөө”-ний төсөл; “ХХЗХ-ны 2024 оны хөрөнгө оруулалтын зардал”-ын төсөл; “ХХЗХ-ны 2024 оны хөтөлбөр, арга хэмжээний зардал”-ын төсөл; “ХХЗХ-ны 2024 оны үйл ажиллагааны зардал”-ын төсөл; “ХХЗХ-ны 2025-2026 оны төсвийн төсөөлөл”ийн төсөл) батлах тухай; “Дараа үеийн хөдөлгөөнт холбооны системд (5G) радио давтамжийн зурвас ашиглах тусгай зөвшөөрөл олгох сонгон шалгаруулалтын баримт бичиг”-ийн төслийн тухай (Хорооны 2023 оны ээлжит 15 дугаар хуралдаанаас өгсөн чиглэлийг хэрэгжүүлэх: Тэмдэглэлийн төсөл); “Радио долгион өргөн нэвтрүүлгийн хяналтын төвийн 2023 оны үйл ажиллагааны тайлан” танилцуулга; “Улаанбаатар хотын нутаг дэвсгэрт радио өргөн нэвтрүүлгийн дахин дамжуулах станцад радио давтамж, радио давтамжийн зурвас ашиглах тусгай зөвшөөрөл олгох сонгон шалгаруулалт”-ын үнэлгээний хорооны санал, дүгнэлтийн тухай (Хорооны 2023 оны 113 тоот тогтоолыг хэрэгжүүлэх); Тусгай зөвшөөрлийн тухай (ТЗ шинээр олгох, хугацаа сунгах, нэмэлт оруулах, хүчингүй болгох тухай үнэлгээ, дүгнэлт; Харилцаа холбооны сүлжээний дугаар олгох, ашиглалтын сунгах, хүчингүй болгох тухай үнэлгээ, дүгнэлт) зэрэг 5 үндсэн багц асуудлыг тус тус хэлэлцэж, зохицуулах хорооны нийтдээ 23 тогтоолыг баталж, 1 хуралдааны тэмдэглэлээр хугацаатай үүрэг даалгаврыг холбогдох ажлын хэсэгт өгсөн болно.

ХХЗХ-ны 2023 оны ээлжит 15 дугаар хуралдаан (2023-11-30)-аар Хорооны даргын 2023 оны А/289 тоот тушаалаар байгуулагдсан тус хорооны гишүүн, ажлын албаны дарга А.Лувсан-Очирын ахалсан ажлын хэсэг, бүтцийн ажлын албанаас нэгтгэн боловсруулсан “Харилцаа холбооны зохицуулах хорооны 2024 оны үйл ажиллагааны төлөвлөгөө болон орлого, зардлын төлөвлөгөө, байгууллагын 2025-2026 оны төсвийн төсөөлөл”-ийн тухай багц баримт бичгүүдийн төслийн анхны хэлэлцүүлгийг танилцуулж, хорооны дарга, гишүүдээс өгсөн санал зөвлөмж, удирдамж чиглэлийг тусган байгууллагын 2023 оны үйл ажиллагааны төлөвлөгөөний хэрэгжилтийн урьдчилсан тайлан болон төсвийн гүйцэтгэл, 2024 оны төлөвлөгөөтэй хийсэн харьцуулалт, 2024 оны хэрэгжүүлэх хөрөнгө оруулалтын томоохон хөрөнгө оруулалтын төсөл хөтөлбөр, гадаад арга хэмжээний төлөвлөлт, төлөвлөлтийг байгууллагын үйл ажиллагааны төлөвлөлтийн аргачлал, бүтцийн нэгж, газар хоорондын уялдаа холбоог сайжруулах, Кибер аюулгүй байдлын тухай хуулийг хэрэгжүүлэх зардлын тусгах, зохицуулалтын үйлчилгээний төлбөрийн хэмжээ болон радио давтамжийн ашиглалт, үйлчилгээний төлбөрийг тооцох аргачлалд шинэчлэлт

хийх, хорооны санхүүгийн нөөц, чадварыг дээшлүүлэх талаар арга хэмжээг тусган боловсруулах, хорооны хуралдаанд эцсийн хэлэлцүүлэгт бэлтгэх, энэхүү асуудлыг багцаар нь хуралдаанд дахин хэлэлцүүлэх, батлуулах арга хэмжээ авч ажиллахыг Ажлын хэсэг, холбогдох бүтцийн нэгжийн газар, хэлтсийн удирдлага нарт даалгасан. Ажлын хэсгээс төлөвлөгөөний төслийн анхны хэлэлцүүлгээс өгсөн удирдамж, чиглэлийг тусгаж боловсруулсан “Харилцаа холбооны зохицуулах хорооны 2024 оны үйл ажиллагааны төлөвлөгөө болон орлого, зардлын төлөвлөгөө, байгууллагын 2025-2026 оны төсвийн төсөөлөл”-ийн хувилбарыг Зохицуулах хорооны 2023 оны ээлжит 16 дугаар хуралдаанд хэлэлцүүлэн шийдвэрлэв. Тус хуралдаанаар “Харилцаа холбооны зохицуулах хорооны 2024 оны үйл ажиллагааны төлөвлөгөө (Нийтдээ 2024 оны төлөвлөгөөнд үндсэн 3 ангиллын бүтээгдэхүүний 293 ажил, үйл ажиллагаа төлөвлөгдсөнөөс Хорооны үйл ажиллагааны 2022-2025 оны дунд хугацааны стратегийн зорилго, зорилтод чиглэсэн 32 бүтээгдэхүүний 131 үйл ажиллагаа, нийтлэг ажил үйлчилгээ болон хууль, тогтоомжийг хэрэгжүүлэх 52 чиглэлийн бүтээгдэхүүний 121 үйл ажиллагаа, дотоод үйл ажиллагааны бүтээгдэхүүний 13 чиглэлийн 56 ажлууд багтаасан)-ний төсөл, 2024 оны орлого зардлын төлөвлөгөө, байгууллагын 2025-2026 оны төсвийн төсөөллийг батлах тухай” тухай танилцуулга, тогтоолын төсөл, хөрөнгө оруулалтын төсөл хөтөлбөр, төсөв тооцоо, орлого зардлын тооцоо судалгаа, төлөвлөгөөний төсөл, тогтоолын хавсралтууд болох “Харилцаа холбооны зохицуулах хороо (ХХЗХ)-ны 2024 оны үйл ажиллагааны төлөвлөгөө”-ний төсөл “ХХЗХ-ны 2024 оны орлогын төлөвлөгөө”-ний төсөл, “ХХЗХ-ны 2024 оны зардлын төлөвлөгөө”-ний төсөл, “ХХЗХ-ны 2024 оны хөрөнгө оруулалтын зардал”-ын төсөл, “ХХЗХ-ны 2024 оны хөтөлбөр, арга хэмжээний зардал”-ын төсөл, “ХХЗХ-ны 2024 оны үйл ажиллагааны зардал”-ын төсөл, “ХХЗХ-ны 2025-2026 оны төсвийн төсөөлөл”-ийн төслийг тус тус авч хэлэлцсэн ба тус хуралдаанаар Харилцаа холбооны тухай хуулийн 9 дүгээр зүйлийн 9.1.16 дах заалт, Засгийн газрын 2016 оны 268 тоот тогтоолоор баталсан, Засгийн газрын 2020 оны 65 тоот тогтоолоор нэмэлт, өөрчлөлт оруулсан Харилцаа холбооны зохицуулах хорооны дүрмийн 4.3.2 дах заалтыг тус тус үндэслэн 2023 оны 12 дугаар сарын 20-ны өдрийн 155 тоот “Харилцаа холбооны зохицуулах хорооны 2024 оны үйл ажиллагааны төлөвлөгөө, орлого, зардлын төлөвлөгөө, 2025-2026 оны төсвийн төсөөлөл”-ийг батлах тухай” тогтоолыг 7 хавсралтын хамт батлав. Энэхүү тогтоолын хавсралтаар (Тогтоол-155: Хавсралт-1: “Харилцаа холбооны зохицуулах хорооны 2024 оны үйл ажиллагааны төлөвлөгөө”; Хавсралт-2: “ХХЗХ-ны 2024 оны орлогын төлөвлөгөө”; Хавсралт-3: “ХХЗХ-ны 2024 оны зардлын төлөвлөгөө”; Хавсралт-4: “ХХЗХ-ны 2024 оны хөрөнгө оруулалтын зардал”; Хавсралт-5: “ХХЗХ-ны 2024 оны хөтөлбөр, арга хэмжээний зардал”; Хавсралт-6: “ХХЗХ-ны 2024 оны үйл ажиллагааны зардал”; Хавсралт-7: “ХХЗХ-ны 2025-2026 оны төсвийн төсөөлөл”) баталсан Хорооны 2024 оны үйл ажиллагааны төлөвлөгөөний биелэлтэд хяналт тавьж, батлагдсан зардал, төсвийг зориулалтын дагуу зарцуулан тухай бүр гүйцэтгэлийг тайлагнан ажиллахыг Хорооны дарга /Г.Чинзориг/-д даалгав.

ХХЗХ-ны 2023 оны ээлжит 16 дугаар хуралдаанаар “Радио долгион өргөн нэвтрүүлгийн хяналтын төвийн 2023 оны үйл ажиллагааны тайлан” танилцуулгыг сонсов.

Зохицуулах хорооны 2023 оны ээлжит 14 дүгээр хуралдаан (2023-10-31), 2023 оны ээлжит 15 дугаар хуралдаан (2023-11-30)-аар “Дараа үеийн хөдөлгөөнт холбооны системд (5G) радио давтамжийн зурвас ашиглах тусгай зөвшөөрөл олгох сонгон шалгаруулалтын баримт бичиг”-ийн төслийг тус тус хэлэлцэн тухай бүр холбогдох

удирдамж, чиглэлийг ажлын хэсэгт өгч ажиллаж ирсэн болно. Ажлын хэсгээс тус хуралдаанд энэхүү баримт бичгийн төсөлд санал зөвлөмжийг тусгасан байдал, хэрэгжүүлсэн арга хэмжээний танилцуулга мэдээллийг сонсож, 2023 оны 12 дугаар сарын 20-ны өдрийн 08 дугаар хуралдааны “Хорооны хуралдааны удирдамж, чиглэлийг хэрэгжүүлэх тухай” Тэмдэглэлээр хугацаатай удирдамж, чиглэлийг өгөх нь зүйтэй гэж тогтов.

Зохицуулах хорооны 2023 оны ээлжит 13 дугаар хуралдаанаас (2023-09-28) Радио долгионы тухай хуулийн 5¹ дүгээр зүйлийн 5¹.1.2, 5¹.1.11 дэх заалт, Цахим хөгжил, харилцаа холбооны сайдын 2023 оны 05 дугаар сарын 09-ний өдрийн А/42 дугаар тушаалын хавсралтаар баталсан “Үндэсний радио давтамжийн хуваарилалтын хүснэгт”, Зөвшөөрлийн тухай хуулийн 5.6 дугаар зүйлийн 1 дэх хэсгийг тус тус үндэслэн 2023 оны 09 дүгээр сарын 28-ны өдрийн 113 тоот “Сонгон шалгаруулалт зохион байгуулах, баримт бичиг батлах тухай” тогтоолыг хавсралтын хамт баталсан. Уг тогтоолд, “Улаанбаатар хотын нутаг дэвсгэрт радио өргөн нэвтрүүлгийн дахин дамжуулах станцад радио давтамж, радио давтамжийн зурвас ашиглах тусгай зөвшөөрөл олгох сонгон шалгаруулалт”-ыг зарлах, “Сонгон шалгаруулалтын баримт бичиг”-ийг баталж, энэхүү тогтоол батлагдсантай холбогдуулан сонгон шалгаруулалтын зохион байгуулах, үнэлгээний хороо байгуулах, тогтоолын хэрэгжилтэд хяналт тавьж ажиллахыг тус Хорооны дарга /Г.Чинзориг/-д үүрэг болгосон билээ.

Энэхүү тогтоолыг хэрэгжүүлэх зорилгоор зохион байгуулсан “Улаанбаатар хотын нутаг дэвсгэрт радио өргөн нэвтрүүлгийн дахин дамжуулах станцад радио давтамж, радио давтамжийн зурвас ашиглах тусгай зөвшөөрөл олгох сонгон шалгаруулалт”-ын үнэлгээний хорооны санал, дүгнэлтийн тухай (Хорооны 2023 оны 113 тоот тогтоолыг хэрэгжүүлэх) авч хэлэлцээд, Зөвшөөрлийн тухай хуулийн 5.6 дугаар зүйлийн 1 дэх хэсэг, 2.2 дугаар зүйлийн 1 дэх хэсэг, Харилцаа холбооны тухай хуулийн 9 дүгээр зүйлийн 9.1.2 дахь заалт, Радио долгионы тухай хуулийн 5¹ дүгээр зүйлийн 5¹.1.8 дахь заалт, 11 дүгээр зүйлийн 11.4 дэх хэсэг, тус хорооноос 2023 оны 09 дүгээр сарын 28-ны өдөр зарласан “Улаанбаатар хотын нутаг дэвсгэрт радио өргөн нэвтрүүлгийн дахин дамжуулах станцад радио давтамж, радио давтамжийн зурвас ашиглах тусгай зөвшөөрөл олгох сонгон шалгаруулалтын баримт бичиг”-ийн үнэлгээний ажлын хэсгийн 2023 оны 12 дугаар сарын 19-ний өдрийн нэгдсэн дүгнэлтийг тус тус үндэслэн Зохицуулах хорооны 2023 оны 12 дугаар сарын 20-ны өдрийн 164, 165, 166, 167, 168, 169, 170, 171, 172, 173, 174, 175, 176, 177 тоот тогтоолоор нэр бүхий хуулийн этгээд нарт “Нээлттэй сонгон шалгаруулалтад шалгарсанд тооцож, тусгай зөвшөөрөл олгох тухай” тогтоолыг тус тус батлан шийдвэрлэсэн болно.

Харилцаа холбооны зохицуулах хорооны 2023 оны ээлжит 16 дугаар хуралдаанаар Тусгай зөвшөөрлийн тухай (ТЗ шинээр олгох, хугацаа сунгах, нэмэлт оруулах, хүчингүй болгох тухай үнэлгээ, дүгнэлт; Харилцаа холбооны сүлжээний дугаар олгох, ашиглалтын сунгах, хүчингүй болгох тухай үнэлгээ, дүгнэлт) газар хэлтсийн боловсруулсан танилцуулга, үнэлгээний дүгнэлт бүхий 8 тогтоол, хавсралтын төслийг тус тус авч хэлэлцээд, тус хуралдаанаас 8 тогтоолыг хавсралтын хамт баталсан. Үүнд:

- Зөвшөөрлийн тухай хуулийн 3.2 дугаар зүйлийн 1.1 дэх хэсэг, 5.3 дугаар зүйлийн 1 дэх хэсэг, Харилцаа холбооны тухай хуулийн 9 дүгээр зүйлийн 9.1.2 дахь заалт, 12 дугаар зүйлийн 12.1 дэх хэсэг, Шуудангийн тухай хуулийн 9 дүгээр зүйлийн

9.1.4 дэх заалтыг тус тус үндэслэн 2023 оны 12 дугаар сарын 20-ны өдрийн 156 тоот тогтоолын хавсралтаар 7 хуулийн этгээдэд 8 тусгай зөвшөөрлийг шинээр олгосон;

- Зөвшөөрлийн тухай хуулийн 3.2 дугаар зүйлийн 1.1 дэх хэсэг, 5.5 дугаар зүйлийн 10 дахь хэсэг, Харилцаа холбооны тухай хуулийн 9 дүгээр зүйлийн 9.1.2 дахь заалт, 12 дугаар зүйлийн 12.1 дэх хэсэг, Өргөн нэвтрүүлгийн тухай хуулийн 30 дугаар зүйлийн 30.1.10 дахь заалтыг тус тус үндэслэн 2023 оны 12 дугаар сарын 20-ны өдрийн 157 тоот тогтоолын хавсралтаар 4 хуулийн этгээдийн 5 тусгай зөвшөөрлийн хугацааг сунгасан;
- Зөвшөөрлийн тухай хуулийн 3.2 дугаар зүйлийн 1.1 дэх хэсэг, Харилцаа холбооны тухай хуулийн 9 дүгээр зүйлийн 9.1.2 дахь заалтыг тус тус үндэслэн 2023 оны 12 дугаар сарын 20-ны өдрийн 158 тоот тогтоолоор 1 хуулийн этгээдийн 1 тусгай зөвшөөрөлд өөрчлөлт оруулсан;
- Зөвшөөрлийн тухай хуулийн 3.2 дугаар зүйлийн 1.1 дэх хэсэг, 6.2 дугаар зүйлийн 1.1 дэх хэсэг, Харилцаа холбооны тухай хуулийн 9 дүгээр зүйлийн 9.1.2 дахь заалт, Шуудангийн тухай хуулийн 9 дүгээр зүйлийн 9.1.4 дэх заалт Юни карго терминал ХХК-ийн хүсэлтийг тус тус үндэслэн 2023 оны 12 дугаар сарын 20-ны өдрийн 159 тоот тогтоолоор 1 хуулийн этгээдийн 1 тусгай зөвшөөрлийг хүчингүй болгосон;
- Зөвшөөрлийн тухай хуулийн 3.2 дугаар зүйлийн 1.1 дэх хэсэг, 6.2 дугаар зүйлийн 1.1 дэх хэсэг, Харилцаа холбооны тухай хуулийн 9 дүгээр зүйлийн 9.1.2 дахь заалт болон иргэн М.Мөнхбаярын хүсэлтийг тус тус үндэслэн 2023 оны 12 дугаар сарын 20-ны өдрийн 160 тоот тогтоолоор 1 хуулийн этгээдийн 1 тусгай зөвшөөрлийг хүчингүй болгосон;
- Харилцаа холбооны тухай хуулийн 9 дүгээр зүйлийн 9.1.9 дэх заалт, Харилцаа холбооны сүлжээний дугаарын ашиглалт, үйлчилгээг бүртгэхтэй холбогдсон журмын 4.4 дэх хэсгийг тус тус үндэслэн 2023 оны 12 дугаар сарын 20-ны өдрийн 161 тоот тогтоолоор 2 иргэн, хуулийн этгээдэд харилцаа холбооны сүлжээний 2 дугаар шинээр олгосон;
- Харилцаа холбооны тухай хуулийн 9 дүгээр зүйлийн 9.1.9 дэх заалт, Харилцаа холбооны сүлжээний дугаарын ашиглалт, үйлчилгээг бүртгэхтэй холбогдсон журмын 4.4 дэх хэсгийг тус тус үндэслэн 2023 оны 12 дугаар сарын 20-ны өдрийн 162 тоот тогтоолоор 2 хуулийн этгээдийн харилцаа холбооны сүлжээний 2 дугаар ашиглалтын хугацааг сунгасан;
- Харилцаа холбооны зохицуулах хорооны дүрмийн 3.1.2, Харилцаа холбооны тухай хуулийн 9.1.9 дэх заалт, Кэйбридж ХХК-ийн хүсэлтийг тус тус үндэслэн 2023 оны 12 дугаар сарын 20-ны өдрийн 163 тоот тогтоолоор 1 хуулийн этгээдийн 1 бүртгэлийн гэрчилгээг хүчингүй болгож тус тус тус шийдвэрлэсэн.

Хуралдааны баталсан тогтоолын жагсаалт, холбогдох хавсралтыг <http://www.crc.gov.mn/main.php?cid=1&do=70&did=0> үзнэ үү).

Харилцаа холбооны зохицуулах хороо
2023-12-28